

## A Sèn Jan la Giornèda FAI da d'uton

L Grop de Fascia e Fiem endreza en sabeda ai 13 de otober na raida per descrior la belezes storiches, artistiches, culturèles e religiouses de nosc raion

**Ambient** - L Grop FAI de la valèdes de Fascia e Fiem, su envit de la delegazion de Trent, chest an l'ha volù endrezèr te Fascia e più avisa sul tegnir del Comun de Sèn Jan, desche zenter de straordenèr enteress sot l profil storich, artistich, cultural e religious, la Giornèda FAI da d'uton 2018, che la é belapontin en program doman, sabeda ai 13 de otober.

L percors, concordà con la delegazion regionèla, à tout sù l'onom de "A la descriora de Sèn Jan" e l perveit na raida sul teritorie per cognoscer la marevees artistiches e culturèles de chest cianton.

Da les 9.30 se se troa tedant l'ofize de l'Apt de Vich per jir fin sun geja de Sènt'Ugèna a veder chest straordenèr monument de èrt sacra



*L logo del FAI.*

che travers sia formes se confèsc benon al paesaje. La raida e la vijita a la geja vegnarà fates dai compagnadores del teritorie

Gianluigi Chiocchetti, Gilberto Bonani, Erica Bernard e con la spiegazions de Franca Chiocchetti del Museo Ladin. Dapò se jirà sa Valongia e ju de retorn a Vich, olache domesdi da les 14.30 se podarà veder la Pieif de Sèn Jan; la vijita a chest lech rich de memories storiches vegn fata da Roberto Daprà, president del Grop FAI Fascia e Fiem. Te chesta ocasion se podarà sentir ence vèlch ciantia sacra del grop musical "Demò Ousc" con la soprana Angela Chiocchetti.

Sobito dò se jirà a veder Ciasa Soldà de la familia Rizzi olache Daniela Brovadan del Museo Ladin spiegarà i bie depenc a carater profan de na batuda de ciacia a la reversa



*La delegazion FAI de Fascia e Fiem jirà a veder ence i bie depenc de Ciasa Soldà.*

che se troa laite; da les 15.00 a les 19.00 la raida se serarà sù con la vijita al Museo Ladin de Fascia.

L'event l'ha l patrozinie de l'Aministrazion del Comun de Sèn Jan e del Comun general de Fascia.